

# 8 APA BERLAKU



PESERTA bersama pelajar dan kakitangan Universiti Udayana, Denpasar, Bali selepas persembahan serta perkongsian ilmu sempena program Lawatan Layar Pariwisata di Bali, Indonesia, baru-baru ini.

## UPM PERKENAL LAYAR PARIWISATA

Oleh MOHAMMAD AL FAIZAL  
ABDUL KARIM

[pengarang@utusan.com.my](mailto:pengarang@utusan.com.my)

**M**ALAYSIA dan Indonesia merupakan negara yang mempunyai banyak persamaan daripada segi tradisi serta budaya. Masyarakat di kedua-dua negara berkenaan memiliki nilai serumpun yang masih dipelihara sehingga kini.

Bagaimanapun, masih terdapat perbezaan dalam aspek budaya dan bagi memahami perbezaan itu, Persatuan Teater dan Drama Pentas Kumpulan 1 Universiti Putra Malaysia (UPM) menganjurkan program Layar Pariwisata ke Bali, Indonesia. Program lawatan itu merupakan anjuran bersama Pusat Kokurikulum dan Pembangunan Pelajar UPM.

Pengaruh program, **Aditya Hутama** berkata, program Layar Pariwisata dianjurkan untuk memberi pendedahan lebih mendalam kepada peserta tentang budaya serta tradisi di Indonesia.

"Lawatan ini turut menerima kerjasama Universiti Udayana, Denpasar. Menerusinya, peserta

diberi peluang melihat sendiri kepelbagaiannya budaya serta adat yang berusia ratusan tahun di Bali.

"Pada masa sama, program ini memberi peluang kepada peserta memperkenalkan budaya Malaysia kepada penduduk tempatan," katanya.

Dalam pada itu, Aditya memberitahu, UPM komited menganjurkan program yang membina sifat kepemimpinan dalam kalangan pelajar. Oleh itu, katanya, program berkenaan sesuai dan bertepatan dengan objektif berkenaan.

"Program ini adalah platform untuk memperkenalkan UPM sebagai landasan kepada pembangunan dan kepemimpinan anak muda dalam era globalisasi," ujarnya.

Antara aktiviti diadakan adalah menonton persembahan Tarian Saraswati oleh pelajar Universiti Udayana, persembahan deklamasi sajak daripada pelajar UPM dan sesi perkongsian ilmu serta pertukaran pendapat mengenai budaya.

Dalam pada itu, pelajar program Ijazah Sarjana Muda Ekonomi, Fakulti Ekonomi dan Pengurusan UPM, **Nurun Najwa Nor Aripin**

berkata, dia bertuah kerana diberi peluang mengikuti program itu. Katanya, penyertaannya telah membuka perspektif berbeza tentang budaya asing khususnya di Indonesia.

"Pengalaman ke negara orang sangat berharga. Selain dapat meningkatkan kemahiran insaniah, ia juga memperbaiki kebolehan berkomunikasi serta kepemimpinan dalam diri," katanya.

Fasilitator program tersebut, **Ahmad Qadry Basri** berharap peserta dapat memanfaatkan ilmu yang diperoleh untuk memperkasa jati diri. Katanya lagi, program seumpama itu perlu diperbanyak dari semasa ke semasa.

"Program ini telah dirancang selama setahun. Alhamdulillah, kami berjaya melaksanakannya hasil kerjasama semua pihak. Saya harap lebih banyak program yang sama dapat dianjurkan untuk merapatkan lagi hubungan antara dua negara," jelasnya.

